



## POLOAIGA FAALAVELAVE FAAFUASE'I NUMERA 70

### TULAFONO FAAVAE O LE MALO TUTOATASI O SAMOA 1960 (MATAUPU 105/106)

**O AU NEL, TUIMALEALI'IFANO VA'ALETOA SUALAUVI II**, Ao o le Malo o Samoa, i luga o le fautuaga a le Kapeneta **FK (22) Faapitoa 14**, ma le **Mataupu 106** o le Tulafono Fa'avae, ou te faia ai nei **POLOAIGA**:

#### **1. Femalagaiga Faavaomalo vaalele ma vaa a lalo:**

- (1) E tapunia femalagaiga faavaomalo i vaalele sei vagana vaalele poo vaa ua faataga e le Kapeneta i se tulaga faanatinati ma tatau ai.
- (2) E tapu se tagata Samoa e umia nisi sitiseni ona faaaogaina se tusi folau a se isi atunu'u mo le malaga atu ai i fafo o Samoa, ma toe taliu mai ai i le tusi folau Samoa poo se tusi folau ua iai se pemita faataga e ulafale ai i totonu o Samoa (visa exemption) mo se malaga pu'upu'u.
- (3) E faatagaina ona malaga mai i Samoa ma toe foi vaalele mo uta (cargo flights) e aumai ai ma toe ave uta (cargo) ma pasese i vaiaso taitasi e faamaonia e le Kapeneta, seia vagana ua toe faia iai se faaiuga a le Kapeneta.
- (4) E ui lava o iai aiaiga mo le faanfoesea i lalo o le Poloaiga 2, o pasese na faamaonia e le Kapeneta e malaga mai i Samoa e mafai ona tuusaunoa mai le faatinoina o aiaiga a le soifua maloloina mo le faanfoesea i Samoa, i lalo o aiaiga nei:
  - (a) mo fomai suesue faapitoa mo tino maliu ma inisinia mo le fale-maliu:
    - (i) e tatau ona tuuina mai e le pasese se faamaoniaga ua maea ona faia lona tui puipui mo le Koviti-19 a o lei malaga mai i Samoa;
    - (ii) e utagia e le pasese isi aiaiga faalesoifua maloloina e aofia ai le faia o ofu faapitoa a o faatino taotoga mo tino maliliu;
    - (iii) i le maea ai o le faatinoga o taotoga mo tino maliu, le toe malaga ese atu o tagata mai i Samoa i se taimi vave.

- (5) E faatagaina ona malaga mai i Samoa vaalele faapitoa Airforce (Airforce flights) pe a faamaonia e le Kapeneta mo:
- (a) le auina mai o ni uta auupega malolosi;
  - (e) le auina mai o ni fesoasoani i taimi o faalavelave fa'afuase'i matuiā e aafia ai Samoa i se tulaga e tatau ai; po'o
  - (i) ni isi lava mafuaaga e tusa ai ma tulaga e tatau ai.
- (6) Ua tapu le toe ulufale mai o soo se ituaiga vaa seia vagana ai:
- (a) vaa oloa ma vaa suauu;
  - (e) vaa fagota mo le la'u ese o a latou uta (offload) ma le utuina (refuel) ma mo sapalai moomia po o se vaa fagota ua faataga mai e le Kapeneta i se tulaga e tatau ai;
  - (i) vaa ua faatagaina mo le avatu ai cable supplies ma mea faigaluega mo submarine cables mai le nofoaga tutotonu (hub) o loo teu ai nei cable supplies;
  - (o) nisi ituaiga vaa, e aofia ai vaa failā ma nisi, e faamaonia e le Kapeneta mo le utuina (refuel) po o ni isi tulaga e tatau ai;
  - (u) vaa e faatagaina mo le faigamalaga i le va o Samoa, Tokelau ma Amerika Samoa poo ni isi lava atunuu e pei ona faamaonia e le Kapeneta;
- (f) tapu ona o ese le auvaa mai i le vaa seia vagana ua faamaonia atu e le Kapeneta.
- (7) Mo vaa fagota e faatagaina i lalo o le (6)(e) o aiaiga nei e tatau ona mataituina:
- (a) e nā o le 4 vaa fagota e faataga ona taula i le Uafu i Matautu mo se taimi, ma:
    - (i) mo vaa fagota tetele purse seiners ia lē silia i le 120 itula ona taula mo le la'ueseina o uta i'a, ma toe faatutumu o a latou sapalai ao le'i tuuva'a ese atu ma Samoa; ma
    - (ii) mo vaa fagota long liners e oo atu le mamafa o latou uta i le 100 – 130 tone, ia lē silia i le 72 itula ona taula mo le la'ueseina o uta i'a,

ma toe faatutumu o a latou sapalai ao le'i tuuva'a ese atu ma Samoa;  
ma

(e) ia usitaia siaki mo le soifua maloloina (quarantine) e pei ona faatonuina e le Faatonu Sili o le Matagaluega o Soifua Maloloina; ma

(i) tapu ona o ese le auvaa mai i le vaa seia vagana ua faamaonia atu e le Kapeneta; ma

(o) faamalosia le tuuina mai o le polokalame o femalagaiga o vaa fagota faatasi ai ma le lisi o auvaa (crew list) e fia ofi mai i le atunuu i le Pulega o Uafu, Matagaluega o Faatoaga ma Faigafaiva, Matagaluega o Leoleo ma Falepuipui, ma le Matagaluega o Soifua Maloloina; ma

(u) ia lē i lalo ifo o le 28 aso talu ona tuua e le vaa fagota le uafu mulimuli sa taula ai, poo se fesuiaiga o le auvaa a o lei taunuu mai i le uafu i Matautu; ma

(f) ia faailoa mai le talosaga a soo se vaa fagota i le Pulega o Uafu ma le Matagaluega o Faatoaga ma Faigafaiva e fia ulufale mai i Samoa i totonu o le lima (5) aso ao lei taunuu mai i le uafu i Matautu; ma

(g) e tapu le fesuiiai o auvaa i ogasami poo nisi galuega faatino i luga o le vaa e aofia ai isi vaa fagota.

(8) E le tatau ona sili atu ma le lua vaa oloa poo isi vaa e faatagaina i lalo o le 6(a) ma le (i) ona taula i se taimi e tasi i le Uafu i Matautu ma e tatau ona faamalieina vaega manaomia mo le saogalemu a le Pulega o Uafu ma Taulaga ma isi Matagaluega ma Ofisa a le Malo.

(9) Mo vaa e faatagaina i lalo o le (6)(o) mo faigamalaga i le va o **Samoa ma Tokelau**, o le a aiaia e faapea:

(a) le faatagaina o le ulufale mai o tagata Tokelau i Samoa, sei vagana ua logoina e le Matagaluega o le Va-i-Fafo ma Fefaatauaiga le taofia ona ulufale mai;

(e) e tatau ona logoina o le Matagaluega o le Va-i-Fafo ma Fefaatauaiga i le mafuaaga ma le aso tonu o le faigamalaga a o le'i malaga mai;

(10) Ua faatonuina le Matagaluega o le Soifua Maloloina ina ia matua faamalosia puipuiiga mo tagata uma i lalo o le nei poloaiga.

(11) Ia feutagai le Matagaluega o le Va-i-Fafo ma Fefa'atauaiga e feutaga'i ma le Malo o Niu Sila mo le faamautuina o aiaiga talafeagai uma e ao ona malilie iai atunuu e lua, mo le toe tatalaina o faigamalaga (travel bubble) i le va o **Samoa ma Niu Sila**.

## **2. Faanofosea**

(1) E tatau i se pasese, pailate ma le auvaa e malaga mai i Samoa i se vaalele po o se vaa faatagaina i lalo o le Poloaga 1(1), (3) ma le (4) ona faatumu pepa faamaonia faale- soifua Maloloina e pei ona tuuina atu, ma sainia se tautoga faaletulafono tusitusia (declaration) pe na ia aafia muamua pe leai i le siama o le COVID19, ma faanofosea pea taunuu mai i Samoa mo aso e 21 po o se isi vaitaimi e faatonuina e le Faatonusili o le Soifua Maloloina i lalo o aiaiga nei:

(a) i nofoaga ma aiaiga e faamaonia e le Kapeneta atoa ai ma le tofogi e le Malo mo na'o tagatanu'u Samoa o apitaga ua faanofosea ai, taumafataga o le taeao faatasi ai ma le aoauli ae tofogi e le tagata lava ia lana meatausami o le afaifi;

(e) le faanofosea o tagata i o latou aiga i luga o aiaiga faatulagaina e le Pule Faatonu o le Matagaluega o Soifua Maloloina.

(2) Le faamalosia ona faanofosea o frontline ma support staff e pei ona faatonuina e le Faatonusili o le Soifua Maloloina o loo galulue mo le puipuia o le faamai o le koviti i lalo o aiaiga e pei ona fuafuaina e le Faatonusili o le Soifua Maloloina.

(3) Ua faatonuina le Matagaluega o le Soifua Maloloina ina ia matua faamalosia puipuiga mo tagata uma i lalo o le nei poloaga.

## **3. Potopotoga i nofoaga faitele:**

(1) Tapu potopotoga toatele ma nofoaga faitele se I vagana ai feoaiga ua faataga I lalo o le poloaga 6 i lalo o aiaiga nei:

(e) e tapu tamaiti lalo ifo o le 12 tausaga le matua;

(i) faaali le pepa tui (COVID19 Vaccination Card);

(o) faamalosia le tutu/nofo vava;

(u) faamalosia le fai o tali fofoga (face masks).

- (2) E tapu tafaoga i matafaga, vaitafe ma so'o se vai taele (pools);
- (3) Ua tapu nei ona toe tumutumu tagata i nofoaga o femalagaiga e pei o malaevaalele ma uafu, se'i vaganā o tagata e malaga.

#### **4. Auai atu i Tapuaiga Faalelotu ma Faalapopotoga Faalelotu**

Ua tapu ona auai atu i tapuaiga faalelotu ma faalapopotoga faalelotu.

#### **5. Femalagaiga faalotoifale:**

##### **(1) *Pasi ma Taavale laupasese laiti***

Ua tapu nei femalagaiga ma feoaiga o pasii ma taavale la'u pasese laiti.

##### **(2) *Isi ituaiga Taavale***

(a) E faataga femalagaiga ma feoaiga o taavale la'u uta ma loli kiliva i lalo o aiaiga nei:

(i) mai i le 9:00 i le taeao i le 5:00 i le afiafi o le Aso Toonai 19 Mati 2022 ma le Aso Gafua 21 Mati 2022;

(ii) mo le tuuina atu o oloa manaomia (essential supplies).

(e) E faataga femalagaiga ma feoaiga o taavale mo le aoina o lapisi ua faa konekarate i lalo o le Matagaluega o Punaoa ma Siosiomaga (MNRE).

##### **(3) *Vaa***

Ua tapu femalagaiga o Vaa i le vā o Upolu ma Savaii sei vagana ai

(a) mo le faamoemoe o le aveina taavale la'u uta ma loli kiliva mo le tuuina atu o oloa manaomia ma gasegase tigaina (essential supplies and medical emergencies) e pei ona faatagaina e le Kapeneta.

(b) ma isi tulaga ua faamaonia atu e le Kapeneta.

##### **(4) *Vaalele***

Ua tapu femalagaiga a vaalele sei vagana ua faamaonia e le Kapeneta.

#### **6. Maketi, Faleoloa, Supamaketi ma Pisinisi:**

(1) Ua tapunia pisinisi uma seia vagana ai pisinisi ua taua i lalo e tatala i le 8:00 i le taeao seia oo atu i le 2:00 i le afiafi o le Aso Toonai 19 Mati 2022, Aso Gafua 21 o Mati 2022 ma le Aso Lua 22 o Mati 2022:

(a) maketi (e aofia le maketi o i'a ma le maketi e faatau ai mea taulima (flea market)) ma ua tapu ona toe momoe ai nisi i nei nofoaga i le po;

(e) Supamaketi ma faleoloa laiti;

- (i) Faleaiga mo le taumafataga e takeaway;
- (o) Faleoloa siiatua (Wholesales);
- (u) Faletalavai;
- (f) Falevai;
- (g) Pamu penisini;
- (l) Auaunaga tau suau'u (Petroleum Products Supply Limited);
- (m) Auaunaga faa sikulaki (security services) i taimi masani ua faatapulaaina mo le tuuina atu o auaunaga;
- (n) Auaunaga tau kesi;
- (p) Auaunaga i luga o le uafu (stevedoring) i taimi masani ua faatapulaaina mo le tuuina atu o auaunaga i le uafu;
- (s) Auaunaga mo le aoina o le lapisi i taimi ua faatapulaaina I lalo o latou konekarate ma le MNRE.

(2) E tatala faletalimalo i itula masani e tusa ai ma aiaiga i lalo o lenei Poloaiga:  
 (a) mo i nao latou e nonofo i totonu o le faletalimalo (In-House guests);

(e) e mafai ona tatala faleaiga ma faletalimalo mo so'o se tasi mo taumafataga e takeaway i le 8:00 i le taeao seia oo atu i le 2:00 i le afiafi o le Aso Toonai 19 Mati 2022, Aso Gafua 21 o Mati 2022 ma le Aso Lua 22 o Mati 2022:

(3) E tapu ona tatala pisinisi i le Aso Sa.

(4) Mo le saogalemu o tagata i lalo o lenei poloaiga, e tatau ona utagia aiaiga I lalo o le Poloaiga 3 ma aiaiga mo le puipuiga o le pipisi o le fa'ama'i o le Korona Vairasi 19 e pei ona fautuaina e le Matagaluega o Soifua Maloloina po o le National Emergency Operation Centre.

## **7. Faatau oloa i magaala ma tafaala:**

(1) Ua tapu ona fa'atau savali oloa i luga o le auala.

(2) E matua tapu ona faatau savali e tamaiti e i lalo ifo o le 16 tausaga ni oloa i soo se taimi.

## **8. Faatauina o le Ava Malosi:**

Ua tapu le faatauina o le Ava malosi i soo se faleoloa laiti ma supamaketi ma pa pia i totonu o fale talimalo.

### **9. Aoga:**

- (1) Ua tapunia uma aoga o le malo, Ekalesia, aoga tumaoti faapea Iunivesete ma aoga maualuluga.
- (2) E tuuina atu i le Matagaluega o Aoga, Taaloga ma Aganuu le tapenaina o isi auala mo a'oa'oga (i.e online learning) ma polokalame mo le faatino ina o a'oa'oga ma faaitiitia ai le aafia o faagasologa o le polokalama.

### **10. Falema'i, ma'i, tausima'i ma siigama'i:**

- (1) Ua matua tapu ona toe ulufale se tagata i soo se falema'i (hospital) sei vaganā ai ua moomia ona vaai se foma'i.
- (2) Ua matua tapu ona toe ulufale se tagata i soo se isi ituaiga falema'i (health facility) e sei vaganā ai ua moomia ona vaai se foma'i i lalo o aiaiga nei:
  - (a) faaali le pepa tui (COVID19 Vaccination Card);
  - (e) faamalosia le tutu/nofo vava;
  - (i) faamalosia le fai o tali fofoga (face masks).
- (3) Mo le tagata ua taofia:
  - (a) ua nā o le tasi le tagata tausima'i e faataga; ma
  - (e) e nā o le toalua (2) tagata e faataga mo asiga.
- (4) Ua taofia ona toe auina atu i Niu Sila o gasegase mo togafitiga i lalo o le Polokalame masani a le Malo, se'ia vagana ua faamaonia mai e le Kapeneta.

### **11. Auaunaga manaomia**

Faatagaina le tatala ina o auaunaga manaomia ua faamaonia e le Kapeneta.

### **12. Aiaiga mo galuega a le Malo:**

- (1) Ua tapunia uma galuega a le Malo sei vagana ai auaunaga moomia mo le soifua (essential services).

- (2) Ia faatino e le Komisi o Galuega a le Auaigaluega a le Malo, (“Komisi”) ni aiaiga e alagataua ona faatino mo tagata faigaluega a le Malo, e faaititia ai le ono pipisi o le fa’ama’i e pei o le galulue mai i le fale e faaoga ai initaneti.
- (3) O aiaiga e faataatia e le Komisi, e aiaia uma ai Ofisa ma Matagaluega ma Faalapotopotoga a le Malo.
- (4) E taua atu aiaiga e faataatia e le Komisi i lo’o le Labour and Employment Relations Act 2013 ma isi tulafono e faatatau i Ofisa ma Matagaluega ma Faalapotopotoga a le Malo.
- (5) Ua tapu malaga faavaolemalo sei vagana ua faatagaina e le Kapeneta.

### **13. Tiute o le Matagaluega o Soifua Maloloina:**

- (1) Ia faatinoina e le Matagaluega o Soifua Maloloina le unaia o polokalame falauiloa o le puihuiga o le pipisi o le fa’ama’i o le Korona Vairasi 19, mo le nofo silafia o le atunu’u.
- (2) E iai le malosiaga a le Pule Sili a le Matagaluega o Soifua Maloloina e tuuina atu ai fautuaga mo femalagagaiga mo e faimalaga mai fafo ma fautuaga faafemalagaaiga mo faigamalaga faavaomalo mo le puihuiga o le pipisi o le fa’ama’i o le Korona Vairasi 19.

### **14. Malosiaga o le Matagaluega o Leoleo:**

Ua tuuina atu ile Matagaluega o Leoleo le malosiaga e faamalosi ai le mata’ituina o leni Poloaiga.

### **15. Malosiaga o le Matagaluega o Pulega o Tineimu ma Fa’alavelave Tutupu Fa’afuase’i a Samoa:**

E faaauau pea auaunaga a le Matagaluega o Pulega o Tineimu ma Faalavelave Tutupu Faafuasei a Samoa mo faalavelave faafuasei.

### **16. Malosiaga faapitoa o faauluuluga o Matagaluega:**



- (1) Ua tuuina atu le malosiaga i faauluuluga o Matagaluega ma Ofisa uma o le Malo, o loo iai ā latou malosiaga fa'aletulafono e faatino ai ia malosiaga faaletulafono, faapea ai, malosiaga o faauluuluga e faatino ai Fuafuaga Mamao a le Malo i le tali atu i le Korona Vairasi 19 (Response Matrix).
- (2) E mafai e le Kapeneta ona faia Tulafono Faatonutonu poo tulafono laiti mo le faatinoina o gaoiga uma e Ofisa a le Malo mo galuega e tatau mo le soifua saogalemu o tagata, ma le tausiga o le nofo filemu.

### **17. Pepa faailoa o le Solia o se Poloaiga Faalavelave Faafuasei:**

- (1) E mafai e leoleo ona tuuina atu le Pepa Faailoa o le Solia o se Poloaiga i soo se tagata ua solia aiaiga o Poloaiga ua faataoto i totonu o Poloaiga mo Faalavelave Faafuasei.
- (2) O Pepa Faailoa i lalo o lenei poloaiga e tatau ona faamaonia e le Komesina o Leoleo.
- (3) Soo se tagata ua tuuina atu i ai se Pepa Faailoa o le Solia o se Poloaiga, e tatau ona ia totogi le sala tupe ua ta'ua i lea Pepa Faailoa, i totonu o le 24 itula (e le aofia ai piliota o vavao i lalo o lenei poloaiga) talu ona tuuina atu iai le Pepa Faailoa.

### **18. Faasalaga:**

- (1) E solitulafono le tagata e lē usitaia Poloaiga uma ua taua i luga seia vagana ai le poloaiga 1, ma o faasalaga nei:
  - (a) sala tupe:
    - (i) mo tagata ta'itoatasi, \$200 mo le solitulafono muamua, ma le \$500 i aso ta'itasi e faaauau ai lea solitulafono; ma
    - (ii) mo faalapotopotoga faatulafono, \$5,000 mo le solitulafono muamua, ma le \$7,000 i aso ta'itasi e faaauau ai lea solitulafono; poo le
  - (e) taofia i lalo o le vaaiga a Leoleo e lē sili atu i le 3 masina; poo le

- (i) taofia i lalo o le vaaiga a Leoleo ma le sala tupe i lalo o le parakalafa (a).
- (2) E solitulafono le tagata e lē usitaia le poloaiga 1 ma o fa'asalaga nei:
- (a) mo tagata ta'ito'atasi o le sala tupe \$2000 ; ma
  - (e) mo faalapotopotoga faatulafono po'o se kamupani o le sala tupe e \$15,000 mo le solitulafono muamua ma le \$20,000 i aso taitasi e faaauau ai lea solitulafono.
- 
- (3) Soo se tagata e umia nisi sitiseni e faaogaina se tusi folau a se isi atunu'u mo le malaga atu ai i fafo o Samoa, ma toe taliu mai ai i le tusi folau Samoa mo se malaga pu'upu'u, e faasala i se sala tupe e \$2,000.00, faaopopo ai ma le totogi e lea lava tagata o lona aumau ai i le nofoaga o le a faanofoesea ai.
- 
- (4) E solitulafono le tagata e lē usitaia tuutuuga mo le faanofoesea e faatonuina e le Faatonu Sili o le Matagaluega o Soifua Maloloina, ma e ono faasala i se sala tupe e \$2,000.00.
- 
- (5) O le totogiina o se sala tupe atoa i lalo o lenei poloaiga, o le a lē molia ai se tagata i se faamasinoga o soligatulafono mo le faasalaga i lalo o le Pepa Faailoa o le Solia o se Poloaiga i lalo o le poloaiga 17.
- 
- (6) A faamaonia le solitulafono a se tasi i lalo o nei poloaiga i luma o se faamasinoga o soligatulafono, e mafai ona faasala i se sala tupe e le sili atu i le \$10,000 poo le fale puipui e lē sili atu i le 12 masina, poo faasalaga uma e lua.
- 
- (7) Mo so'o se pisinisi latou te solia Poloaiga 6 ma le 8 o lenei Poloaiga, o lea faaleaogaina laisene pisinisi poo laisene ava malosi faatasi ai ma faasalaga o loo i lalo o Tulafono o loo aiaia ai laisene pisinisi ma ava malosi.

## **19. Komiti Fautua - Mataupu 108:**

O le Komiti Fautua ua faatuina i lalo o le Mataupu 108 o le Tulafono Faavae, e puipuia mai i ni tagi faaletulafono e ono tulai faasaga i le Komiti i le faatinoina o tiute fai i lalo o le tulafono.

#### **20. Tualumaga:**

- (1) Mo le nofo sauniuni mo se tulaga ogaoga mai auga o lenei faamai Korona Vairasi-19, e mafai ona faataatia ese Tulafono o tualumaga a le Palemene ma le Kapeneta, ina ia mafai ai pea ona faia ni faaiuga tatau mo le atunuu.
- (2) Mo le faia o poloaiga tatau, e mafai ona faia fonotaga faanatinati ma ni faaiuga o le Palemene poo le Kapeneta i lalo o malosiaga o le Tulafono Faavae.

#### **21. Faatupeina:**

O le faatupeina o fuafuaga a le Malo i lalo o lenei Poloaiga e faatupeina mai vaegatupe talafeagai a le Malo.

#### **22. Aloaia:**

- (1) Mo le faatinoina o le poloaiga 1, o galuega uma na faatinoina mai le aso 21 Me 2020 e oo mai i le asō, e aloaia i lalo o aiaiga o lenei Poloaiga.
- (2) Mo le faatinoina o le poloaiga 8, o galuega uma na faatinoina mo le faatauina o le ava malos i le vaitaimi o le Aso Maliu mai i le Aso 1 Aperila 2021 i le 10 i le po, seia pāia le Aso 3 Aperila 2021 i le 6:00 i le taeao, e aloaia i lalo o aiaiga o lenei Poloaiga.
- (3) O se taimi faanofoesea na faatonuina e le Faatonusili o le Soifua maloloina e ese mai le 21 aso, o se taimi faanofoesea e aloaia i lalo o aiaiga o lenei Poloaiga.


#### **23. Fuafuaga o Faalavelave Tutupu Faafuasei:**

O nei poloaiga e aofia i totonu o Fuafuaga o Faalavelave Tutupu Faafuasei (National Disaster Management Plan) e pei ona aiaia i lalo o le Tulafono o le Faafoega o Faalavelave Matuia ma Faalavelave Faafuasei 2007.

E soloia le Poloaiga Faalavelave Faafuase'i Numera 69 o le Aso 17 Mati 2022 e amata mai i le taimi e faamamaluina ai lenei Poloaiga Faalavelave Faafuase'i Numera 70.

O lenei Poloaiga Faalavelave Faafuase'i Numera 70 e amata faamamaluina mai le 12:00 i le vaeluaga o le po o le Aso Faraile 19 o Mati 2022 sei oo i le 12:00 i le vaeluaga o le po o le Aso Lua 22 o Mati 2022.

Sainia i le Aso 18 Mati 2022

  
(Tuimalaleali'ifano Va'aletoa Sua'auvi II)  
AO O LE MALO